

Gratulaziun a mamezza ed a tut las outras mammas

■ Oz è mia figlia da set onns vegnida a chasa ed ha ditg cun in tun da reproscha: «Il scolast ha ditg ch'i saja en sasez malgist ch'i dettia be in di da la mamma e nagin di per il bab.» Jau ponderesch in amen e ditg: «Sas las mammas fan blier ch'ins na vesa betg. Ellas na survegnan nagins raps persunter ed i vegn darar engrazià ad ellas. Perquai fan ins in di da la mamma.» Ed jau hai dumbrà si exempels da lavurs ch'jau fatsch di per di ch'ella strusch s'accoscha. La glista lunga e lungurusa da lavurs n'ha betg persvadi ella: «Far termagls cun nus n'è betg ina lavur e sa disputar cun mai era betg», ha la pitschna revoltà. «Ma jau faschess pli gugent insatge auter che metter perina tai e tes frar, sche vus as scagnais

per voss termagls», è stada mia risposta. «Tge faschessas alura pli gugent?» «Oh per exempel leger la gasetta cun temp e pedà u star ina giada in quart ura da marsch sin il canapè.» E per che la figlia na survegnia betg l'impressiun che jau veglia bandischar ella dal tut da mes plaschairs ditg jau anc: «Flot fiss era da far ina giada in gieu cun vus che plascha a mai e betg adina be in che plascha a vus.» «Bun, tge gieu lesses lura far? Jau fatsch uss cun tai in gieu che plascha era a ti?» «Jau less...», jau stoss ponderar bain, sch'jau hai ina giada l'onur d'astgar eleger: «Dar Tgau Sep.» E mia feglia: «Ouu, naaaaa ... also bun, ma be ina giada.» Jau lasch gudagnar mia mattatscha las emprimas trais giadas da dar tgau Sep uschia ch'ella è pronta da

dar suenter anc tschintg rundas: Da quella gudogna ella trais, ed jau duas. Entant ch'jau dun «mes» tgau Sep cun la mattatscha sa profiteschan ils dus fragliuns pli pitschens discussamain da metter il bogn sut l'aua, struclar la pasta da dents e duas buttiglias schampoo en la tualetta.

La saira raquinta mia figlia cun luscchezza al bab che la mamma haja pers sis giadas da dar tgau Sep. Ella haja pers be duas giadas encunter la mamma. La figlia è sa decidida da zambregiar in regal era per il bab sin il di da la mamma, per ch'il «pauper bab» na saja betg trist. Lura vul ella sa chapescha animar ses fragliuns pitschens dad era «crear» insatge per ils geniturs: I dovra palpìri, stgatlàs da zuplìns, colurs d'aua, e blera, blera,

fitg, fitg blera colla. I vegn en mintga cas a dar ina surpraisa! Ma ins na dastga betg privar ils uffants dal plaschair per il di da la mamma. Quai fiss sco Nadal senza pacs.

Avant in mais pendevan en mes vitg pitschnas affischas: «Uffants zambregian per il di da la mamma (uffants da trais enfin set onns).» Tenor l'affischa avess la mamma da purtar ils uffants trais suentermezdis per in'ura en scolletta. Là fan els alura in bel regal per la chara mamma. Mintg'ura custa 10 francs. Per uffant fa quai pia 30 francs. E sch'jau trametess tut mes trais chars, faschessi pia... Jau sun ma decidida da renunziar sin questa purschida generusa e vegn persunter a cumprar per mamezza in matg fluras per il di da la mamma – betg gist per l'entira summa,

ma tuttina in bel – cun charta da gratulaziun.

Il raschienen cun mia figlia davart il di da la mamma n'hai jau betg pli prendi si. Mes partratg è: «Cura ch'ella è sezza mamma vegn ella a savair tge ch'i vul dir.» Ma ensasez giavisch jau insatge tut auter a mia figlia. Speranza èsi propi ina giada cura ch'ella è mamma uschia ch'igl è malgist ch'i na dat betg er in di da festa per ils babs. Enfin che mes giavisch va en vigur gratulesch jau per il di da la mamma a mamezza ed a tut quella dunnas che san tge che esser mamma vul dir.

(Cura che jau dun a mia mamma quest text da leger manegia ella: «Quai n'avessas ti segir era mai carti.» Mia resposta: «Na, mai.»)

Claudia Cadruvi